



Republika e Kosovës – Republika Kosova
Paneli Zgjedhës për Ankesa dhe Parashtrësia
Izborni Panel za Žalbe i Predstavke

Anr.510/2021

Paneli Zgjedhës për Ankesa dhe Parashtrësia (PZAP), në panelin e përbërë nga gjyqtarët: Ferki Xhaferi kryesues, Adnan Konushevcu dhe Faton Ademi anëtarë, me pjesëmarrjen e zyrtares ligjore Blerta Peci, duke vendosur përkitazi me ankesën e BIRN dhe Internews/Kosova I/KS me seli në Prishtinë, të paraqitur kundër subjektit politik Lëvizja Vetëvendosje me seli në Prishtinë, për shkak të thyerjes së heshtjes zgjedhore, për Zgjedhjet e Parakohshme për Kuvendin e Republikës së Kosovës të datës 14.02.2021, në seancën e panelit të mbajtur me datë 16.02.2021, mori këtë:

V E N D I M

Pranohet e bazuar ankesa Anr.510/2021, e datës 15.02.2021, e paraqitur nga BIRN dhe Internews/Kosova I/KS, me seli në Prishtinë, kundër subjektit politik Lëvizja Vetëvendosje, me seli në Prishtinë, për shkak të thyerjes së heshtjes zgjedhore dhe subjektit politik Lëvizja Vetëvendosje i shqiptohet gjobë, në lartësi prej 500 (pesëqind euro), të cilën detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënimin e dënimit shtesë.

A r s y e t i m

Paneli, ka pranuar ankesën: Anr. 510/2021, e datës 15.02.2021, të paraqitura BIRN dhe Internews/Kosova I/KS, me seli në Prishtinë, kundër subjektit politik Lëvizja Vetëvendosje, me seli në Prishtinë, për shkak të vazhdimin të sponsorimit të fushatës zgjedhore në rrjetin social “Insagram”, në ditën e heshtjes zgjedhore, ditës së votimit, ku kandidati për deputet i subjektit LVV në Komunën e Prishtinës, Valon Ramadani, ka thyer heshtjen zgjedhore duke bërë shpërndarjen dhe postimin e një fotografie ku shfaqet foto e tij bashkë me numrin dhe logon e partisë, në rrjetin e tij social Instagram. Parashtruesi i ankesës konsideron se një veprim i tillë, bie ndesh me rregullat zgjedhore, përkatësisht me LZP dhe Rregullat Zgjedhore dhe është si sanksionueshem nga PZAP-ja, prej 6 mijë deri 25 mijë euro, sipas neni 6 par 6.2 të Rregullës Zgjedhore 01/2012, për kategorizimin e sanksioneve. Ankesës i është bashkangjitur edhe një foto.

Në përgjigjen në ankesë subjekti politik LVV thekson se ankesat për thyerjen e heshtjes zgjedhore duhet të paraqiten para mbylljes së qendrave të votimit, që do të thotë para orës 19:00. Ankesa e BIRN dhe Internews/Kosova I/KS është paraqitur pasi janë mbyllur qendrat e votimit dhe pasi ka kaluar heshtja zgjedhore, andaj si e tillë është e pasafatshme.

Parashtruesi i përgjigjes i prozozon PZAP-it të nxjerrë vendim me të cilin hedhë poshtë si të pa aftashme ankesën numër Anr.510/2021.

PZAP-i, pas shqyrtimit paraprak të bazueshmërisë së ankesës dhe vlerësimit të pretendimeve ankimore, provave materiale – fotografisë të bashkangjitur, që gjenden në shkresat e lëndës, në kuptim të nenit 117 paragrafi 2 dhe 3 të LZP-së, gjeti se:

Ankesa është e bazuar

Nga shkresat e lëndës shihet se kandidati për deputet i subjektit LVV, Valon Ramadani, ka thyer heshtjen zgjedhore duke bërë një postim një foto në rrjetin social Instagram, duke postuar një foto të tij, ku shihet kandidati në fjalë, llogoja e subjektit LVV, numri me të cilin ka garuar subjekti LVV, në këto zgjedhje si dhe numri i kandidatit, veprim ky i cili është në kundërshtim me nenin 36, paragrafi 1, pika b, të LZP-së, si dhe nenin 8 të Rregullës Zgjedhore 13/2013 të KQZ-së me të cilin ka bërë promovimin e subjektit politik LVV, ku me këtë veprim ka bërë thyerjen e heshtjes zgjedhore.

Paneli, vendimin e tij e mbështet në dëshmi të qarta dhe bindëse, konform nenit 117 par.3 të LZP-së, andaj nuk i mori parasysh pretendimet e paraqitësit të përgjigjes në ankesë se ankesa e paraqitur është e pasafatshme sepse kjo ankesë është paraqitur brenda afatit ligjor, përkatisisht kjo ankësë është paraqitur me datë 15.02.2021.

Andaj PZAP, duke marr parasysh këtë si dhe në mbështetje të dispozitave ligjore të LZP-së konstaton se LVV, është përgjegjëse për veprimet e tyre, pasi që me veprimet e lartëcekura ka shkelur nenin 36, paragrafi 1, pika b) të LZP-së, që përcakton veprimet e ndaluara para procesit të votimit ku thuhet se 24 orë para hapjes së Qendrave të Votimit për hedhjen e votës, deri në mbylljen e tyre, subjekteve politike, mbështetësve ose kandidatëve të tyre u ndalohet bërja e fushatës në çfarëdo mënyre.

Paneli, me rastin e shqiptimit të gjobës si në dispozitiv të këtij vendimi, u mbështet në dispozitat e lart cituara, e në veçanti duke marr parasysh rrethanat e rastit siç janë:

- Natyra e shkeljes dhe ndikimit të mundshëm të saj, në procesin zgjedhor;
- Shkallën dhe peshën e shkeljes;
- Faktin se kemi të bëjmë me shkeljen nga mbështetesi
- Faktin se subjekti politik të cilit i është shqiptuar gjoba PDK ka marrë pjesë në zgjedhjet e mëparshme,
- Shumën e fondeve të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura më fushatën zgjedhore.

Paneli, vlerëson se gjoba e shqiptuar si masë, përveç aspektit të dënimit në raport me subjektin që nuk e ka respektuar Kodin e Mirësjelljes, shërben edhe si masë preventive që në të ardhmen subjektet politike të përmbahen nga veprimet që bien ndesh me rregullativën ligjore, që te mos cenohet heshtja zgjedhore duke siguruar klimë të qetë dhe të përshtatshme për votim të lirë si bazament i një procesi demokratik zgjedhor.

Nëse subjekti të cilit i është shqiptuar dënimi nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do ti shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: “ 120.2 Dështimi për të paguar dënimin apo për t’ju bindur një

urdhërese të PZAP-it brenda periudhës kohore të saktësuar në vendimin e PZAP-it, është një shkëlqje tjetër e këtij ligji që mund të sanksionohet me dënim shtesë nga PZAP-i.”, ashtu siç është vendosur si në të dispozitivit të këtij vendimi.

Paneli mbi bazën e të dhënave të lartcekuar në mbështetje të nenit 120.1 pika c) dhe nenit 118.1 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtrës

Anr.510/2021 më datë 16.02.2021

Kryesues i Panelit

Ferki Xhaferi

Këshillë juridike: *Kundër këtij vendimi nuk lejohet ankesa konform nenit 118.4 të LZP-së.*

